

Il protocol da la Sinoda da l'onn 1778 cumenza cun quest import en il cudesch da protocols.

FOTOS AUGUSTIN BEELI

Funtauna da 10 000 sedutas sur 450 onns

La Baselgia evangelica reformada dal Grischun ha festivà venderdi passà la finiziun d'in project che ha cuzzà tschintg onns. Ils historiografs Jan-Andrea Bernhard e Silvio Margadant han ordinà 35 000 registas da l'archiv sinodal e dal cussegl da baselgia. Il material è accessibel en l'archiv da stadi.

AUGUSTIN BEELI/FMR

I saja la memoria istorica da la baselgia chantunala grischuna, ha la presidenta dal cussegl da baselgia, *Erika Cahenzli-Philipp*, ditg en ses bainvegni per l'occurrènz. Venderdi saira han persunas interessadas a l'istorgia ed a la cultura grischuna assistì ad ina pitschna festività. En la sala Brandis a Cuira han ses antecessur, *Andreas Thöny*, ed il responsabel per ils fatgs d'archivaziun dal cussegl da baselgia, ser *Peter Wydler*, preschentà il project da transferir l'archiv sinodal en l'archiv da stadi. Quai è stà pussaivel cun in contract da deposit tranter la Baselgia evangelica reformada dal Grischun ed il chantun. L'importanza dal project ha er accentuà la presidenta dal Cussegl grond, *Aita Zanetti*, cun sia preschientscha a l'occurrènz.

«Ils documents per part fitg custavels pon ussa servir a blers projects scientifics.»

Jon Domenic Parolini, cusseglier guvernativ

Actas han midà domicil

L'archiv sinodal e dal cussegl da baselgia evangelic cumpiglia 15 meters actas da la Sinoda retica dapi l'onn 1537 inclus ils cudeschs da protocol dapi il 1571. Lura datti era protocols ed actas da la sessiun evangelica e dal cussegl grond evangelic. Tut questas plunas documents han ins transferì il 2016 dal tschaler dal domicil da la Baselgia chantunala evangelica, a la via Loë 60, en l'Archiv da stadi al Karlihof a Cuira. I n'è betg stà ina midada usitada e simpla. Il Cussegl grond da la baselgia evangelica reformada ha lubì il 2015 per questa midada in credit da 200 000 francs sur trais onns ed il chantun ha contribuì ulteriurs 50 000 francs.

Cun las garantias e cundiziuns sco er in plan da termins ha *Andreas Thöny* pudì persuader lura dus historiografs d'instradar il project ed ir a la lavur. Il register existent dal cuntegn da l'archiv sinodal e dal cussegl da baselgia na correspundeva absolut betg pli a las pretendiuns dal temp. Ni ils collavoraders da l'administraziun da la baselgia chantunala ni ils scienziads n'avevan ina dretga survista da

quai ch'era en l'archiv. Igl è numnadamain ina funtauna d'informaziuns impurtanta per l'istorgia grischuna.

Lentschatta da l'onn 2022 è quest problem d'access damai ussa schlià. Ils 24 da december, gist sco regal da Nadal, haja ser *Jan Andrea Bernhard* surdà ad el il rapport final dal project, ha *Andreas Thöny* ditg en ses pled.


Elavurà 15 meters actas

Avant tschintg onns hai duvrà in stausch decisiv per avrir il stgazi. Las funtaunas eran avant maun, nagin n'aveva dentant ordinà ellas, nagin n'aveva gughegià da prender a mauns quella lavur. Ser *Jan-Andrea Bernhard*, professor titular a l'institut da teologia da l'università da Turitg ed enfin dacurt plevon da Vuorz-Schnaus, e *Silvio Margadant*, l'archivar da stadi ch'è i en pensiun avant diesch onns, èn stads pronti da manar il project cun il num «Ad Fontes».

Sco emprim pass han ins transferì ils 15 meters actas en l'Archiv da stadi. Il contract da deposit tranter stadi e baselgia chantunala evangelica è stà la basa per sortir tut. La dimensiun da la prestaziun han ils preschents a la festività da venderdi saira pudì udir da divers referents. Tranter quels il directur da la cultura grischuna, cusseglier guvernativ *Jon Domenic Parolini*. «Ils documents per part fitg custavels pon ussa servir a blers projects scientifics», ha el ditg e rendì attent ch'ins na possa betg cumenzar baud avunda da far in bun archiv.

Igl ha duvrà 100 onns

Avant che pudair far las registas, vul dir far ina curta descripziun dal cuntegn da mintga acta, han ils dus istorichers stuì leger ed interpretar quella. Igl è ina premissa per avrir l'access. Il resultat final da «Ad Fontes» èn 7000 paginas sin palpieri en 10 ordinaturs. Tut bain zavrà, classà e signà. Già 1925 aveva il decan *Jakob Rudolf Truog* zavrà l'archiv sinodal e dal cussegl da baselgia. El aveva rendì attent ch'ì duvrass ina ulteriura elavuraziun detagliada. Pir 100 onns pli tard è il problem damai schlià e l'access garanti. Sco quai ch'ìl vicearchivar chantunal, *Silvio Decurtins*, ha explitgà, pon ins tschertgar mintga document sin il computer personal tenor chavazzins. Ins po s'infurmar svel e nudar la signatura dal document giavischà. En la sala da lectura da l'archiv da stadi a Cuira pon las persunas interessadas lura prender a mauns l'original e studegiar quel. Sapientivamain n'hajan ins betg digitalisà mintga palpieri, ha *Silvio Decurtins* ditg, che quai fiss stà cumbinà cun in project bler pli grond ed intensiv. Prender a maun fisicamain il document è dal rest pli autentic che guardar quel sin il monitor.



In import en il protocol da l'onn 1777.



Il Puntstag ha stuì fundar da nov

Jan-Andrea Bernhard (san.) ha explitgà intgins detagls da las actas e protocols ch'el e *Silvio Margadant* han elavurà. Da mintga protocol da las 10 000 sesidas dals 450 onns enfin 1940 han els fatg ina regista, vul dir in chavazzin cun curta descripziun dal cuntegn. Ils historiografs èn s'approfundids a moda acribica en quest temp, els han legì protocols scrits en latin, grec, ebraic e schizunt en siric. E quai en scrittras per part grevas da decifrar da scrivants e decans. La Sinoda retica è dal rest ina fundaziun ch'ìl Puntstag ha fatg l'onn 1537. En il stadi da las Trais Lias hai duvrà in urden administrativ che remplazzava il dretg episcopal. Entant che la confessiun veglia aveva già reglà tut, han ins stuì definir per la nova mintga formalità administrativa, mintga casualia. Ins ha fundà ina sessiun, in cussegl grond confessiunal, ed in cussegl pitschen ecclesiastic, sco er la Sinoda, la radunanza dals plevons. En las actas da l'archiv sinodal sa chattan uschia per exempel las nominaziuns da preditgants, relaschadas ed autras tractandas da personal.